

道教靈驗記卷七之八

常五

道教靈驗記卷之七

八同卷

常五

廣成先生杜光庭集

老君靈驗

賈湘事老君驗

賈湘累世好道崇奉香燈隸職計司家頗豐  
贍然其修奉勤至人所不及有一幅老君像  
慎持以自隨所至之處雖一日一夕亦設焚  
香之位應感之效不可殫述黃巢既陷長安  
大駕西幸湘撻金帛挈骨肉自東渭橋出道  
則剽掠之人不知紀極其一家百餘人行李

無所驚懼遂於龍角山下葺居避難衣冠及  
遠近道流皆投其家各與拯紀請道流轉道  
德度人經不啻萬卷有羣賊忽圍其家湘入  
告老君乃出與語賊投刃於地羅拜其前湘  
問其故默而不答拜亦不已湘捨而入門羣  
賊猶拜唯稱罪過湘哀入持繒帛使人與之  
慰勉移時稍稍而去一無所取自此外戶不  
扃人無敢犯或問羣惡有何所見而反拜之  
曰我見賈常侍左右神兵極多皆長數丈呀  
口瞪目似欲吞噬不覺亡魂喪膽惟恐不得



命耳時既修宮闕車駕將還湘於老君前請  
進退之兆忽見香爐邊有粟苗甚茂上有兩  
穗如風所動粟穗西指乃破產移家歸京永  
興里尋其舊第已墮拆有小舍一二十間權  
爲栖止三月駕歸京師方雜草構宇於基址  
之下得銀六千兩家產益贍五載亂離力未  
嘗闕乃其嚴奉精專太上垂祐使之然也

龍鶴山老君驗

眉州丹陵縣龍鶴山古有觀宇老君像存焉  
邑人祈田蠶雨澤無不立應時有獠賊侵逼

縣邑衆皆危懼因望山焚香以求祐護即見  
老君山所有雲氣連繞縣郭雙鶴飛翔巨龍  
騰躍當縣城之上夷人見之驚懼而退乃大  
葺觀舍累年修崇齋醮禱祈迨無虛月頃自  
荒亂以來無人居止乙丑年縣復旱暵所在  
常五  
祠廟祭皆無驗鎮使王宗坦躬往焚香以甘  
澤爲請虔誠所感俄有陰雲垂空還未及郭  
雨已大霑境邑之內信宿雨足自是人復致  
殷將欲創興古跡以答神功焉

龍瑞觀老君驗



彌牟鎮龍瑞觀老君開元中所製觀在洄流  
上下控澄潭有龍神所處老君靈應鄉里共  
傳頃以夏旱逾旬將欲害稼漢州刺史王宗  
夔憂物疚心誠明感動與羣寮馳往禱祈炷  
香虔拜俄而雲物異常似有徵應還旆赴州  
十里許大雨已至自是豐足每植札瘥爲疫  
水旱致災凡有誠祈必獲昭應矣昔有綿州  
居人年運既長而無嗣續因賈馮馮經過知老  
君累有靈應鄉里所傳乃齋香火詣觀禱祈  
曰欲得一子必令入道懇拜再三而去行及

中路逢一老人共歇樹陰下因話禱求嗣胤  
之事仍許入道老人曰本要子孫繼續今若  
入道亦無繼續矣當得二男一令承家一令  
入道則周備矣如是共行數步失老人所之  
忽覺異香之氣衆行路皆聞方乃悟其神異  
常五  
自是果有二男一以紹繼傳家次子入道頗  
聰悟博覽明於教典自此祈請多驗焉又新  
繁人楊志好道家有疫疾數口委困自詣龍  
瑞瀨祈乞保護精意燃香泣拜以請及還家  
道逢老人授以呪訣及禁水噴灑之法言依



我法行之可轉救他人何況於己但務立功  
勿貪財帛他日當有所遇受訖共行言語之  
次忽然不見楊志驚異了了記其所教歸而  
行之以水噴灑大小皆起一家平復遂轉救  
隣里立有徵驗如此數縣之人賴其救理疫  
毒不侵問其所行但言太上老君法耳故人  
號之為楊老君焉

許述事老君驗

許述事老君乃湖州人也世事農畝力耕恪  
勤而已忽頻年水災衣食稍闕弟兄相聚憂



焉忽夢神人羽衣大冠雲氣而行謂之曰爾  
神仙子孫當須歸心太上以求福祐可致家  
豐力足矣拜謝而覺因求太上之像於紫極  
宮得老君慎一幅畫蹤甚古歸於淨所以奉  
香燈旦夕精謹若奉所親矣自是家道稍豐  
所向畢遂疾疫不作農桑有成遂發願每冬  
置靈寶道場以申荷謝湖浙間冬有滯雨述  
將啓齋壇必遇晴霽雖陰晦累日亦臨事而  
雨止露於庭中初終三日星辰皎潔固為常  
矣鄉里遠近咸伏其精誠神其應感因遊洞

庭山過太湖偶與兩船同行中道風起二船  
駭盪將沒者數四述船如常安穩殊不覺知  
有風及至山下互相勞問二船皆云適見許  
家船上有紫氣平覆船背上有白衣仙人侍  
者皆著五色衣光彩照天盡如金色乃知許  
船是老君所護風波不傷自此二船之人皆  
發心供養求寫許述老君之像誓心歸依盡  
獲靈應

常五

沈瑩事老君驗

吳興沈瑩宿奉至道常供養老君於越州剡



縣市中有居第時草寇裘甫起自農畝嘯聚  
凶徒奔突縣邑素無武備官吏奔駭甫因據  
有縣城詔徵陳許鄭滑淮浙徐泗之軍以討  
之八道天軍圍城以攻之海內久無兵戈居  
人不識征戰師至之日皆潛竄村落瑩蒼惶  
鎖其外門而逸士馬既至瑩誤鎖小僅一人  
在舍中却迴將開門則營幕施列不敢窺犯  
而去其後或勝或敗兵勢不常市肆半被焚  
燬或逆徒所據或官軍所收十餘月日方至  
誅殄罷兵之後瑩所居六七間局鐫如常籬

垣完備及開鑰小童安然問其故云門閉之  
後有一童子衣青衣年可十三四云老君令  
與其嬉戲良久引去一大宅內得飲食果實  
食啗了却與童子爲伴遊戲如半日頃即聞  
老君令其添香纔炷香了即聞開門之聲瑩

常五

五

入門時香煙未歇問其鬪戰火燭隣里焚燒  
驚怕之事一無所聞是則十月戰爭比隣灼  
熱如同頃刻殊不覺知列肆併焚其家獨在  
非大聖神通之力孰能及於此乎瑩亦自此  
栖心玄門探真慕道將有長往之志尋離鄉



邑莫知所之只領此僮而去

蕭山白鶴觀石像老君驗

越州蕭山縣白鶴觀石像老君觀是南朝所  
置歲月既深講堂久已墮摧自三門大殿鐘  
樓之外耕耨已平矣咸通末殿後空地內夜  
夜有光如牕月所射可八九尺間或陰晴改  
候即有白氣如煙鬱勃騰踊人皆以為金玉  
之像道士呂見素焚香祝之俄而白氣變紅  
赤色散光如鋒鋸照耀數畝林木牆壁皆變  
紅色中有影像太上老君之形使人穿掘丈

餘得石像老君高四五尺香水灌沐立於大殿之側見素以香花殷薦是夕夢二青童曰太上有命爾發見真像精奉香燈功著於青簡矣此後民有疾苦歲有水旱苟竭所誠必貽嘉應自是邑人禱祈迨無虛月屢見之後

唯石机缺前面六七寸及脚於土中訪求不獲有湘湖老人水上見一物凌波而去謂其蛇也以杖引之及岸乃石如獸脚上有橫石老人訝其浮水之異留於其庭數日見素偶過其家聞異而閱之果老君之祝取而勘之



曲折相契湖去白鶴四十餘里此藏地中綿  
歷多歲彼浮水上以示非常何神奇之若此  
益表聖像昭驗也

天台觀老君驗

台州刺史姚鵠因遊天台山天台觀命於講

常五

六

堂後鑿崖伐木創老君殿焉將平基址於巨  
石下得石函方可三尺發之中有小石函得  
丹砂三兩玉簡一枚長九寸闊二寸厚五六  
分上有文曰海水竭台山缺皇家寶祚無休  
歇具以上聞敕曰上天降祉厚地呈祥爰有

白簡之靈書出於玄元之寶殿告國祚延洪  
之兆示坤珍啓迪之符惟此休徵實爲上瑞  
宣付史館頒示萬方乃咸通十三年壬辰之  
歲也鵠塑老君像而山中土石相渾求訪極  
難夢青童告之曰殿東丈所有土如堊可以  
用之求而果得塑太上之容侍衛凡八九身  
土無餘矣既成天儀燦然睟容伊穆月玄日  
角若載誕於渦川雙柱三門疑表靈於相野  
洎潔齋以贊之則景氣融空竒光煒爍似聞  
笙磬絲竹之音咸以爲休瑞昔桐柏初構天



尊之堂有雲五色浮靄其上三井有異雲氣  
入堂復出者三書於國史以紀符應清河崔  
尚碑文詳焉此聖祖殿亦自有記

楊開兒夢老君驗

成都楊開兒父母崇道常奉事老君精勤不

常五

七

怠開兒在軍伍中於金堂把截為敵人擒虜  
往南山寨中不被傷殺晝夜常念老君願拜  
見父母忽夢老君賜雲一朵令童子引之送  
於平地童子曰可以歸矣及覺已出山寨因  
得還家到家之日父母為其作百日齋矣

勾道榮鑄金老君驗

勾道榮常精奉老君願鑄白馬金像將所在  
供養欲備金三十兩猶闕二十兩每以爲憂  
焚香之際輕風颯至飄一藥貼墜於其前初  
甚覺輕開之乃金二十兩遂鑄老君像精巧

端嚴逾於常制

楊文簡老君賜金驗

楊文簡綿竹人也世奉香火事老君而蠶農  
稍曠家道似窘一旦暴雨有老嫗避雨於其  
門持物授之曰苦李泉白衣老人令將此簡



來受之甚輕入手乃重發之乃真金也約千  
兩焉復訪老嫗不知所在乃知所說之狀即  
苦李泉老君也富及數世子孫壽考創堂宇  
以答焉

道教靈驗記卷之七

道教靈驗記卷之八

廣成先生 杜光庭集

天師靈驗

昭成觀天師驗

昭成觀壁畫天師歲月既深彩粉昏剥在通

廊之下未嘗有香燈之薦頌政坊內居人姓  
李患疔逾年醫不能愈日以羸瘦待時而已  
忽夢一道流長八九尺來至其前以大袖布  
衣拂其面目之上頓覺清涼謂之曰自此較  
矣勿復憂也於是醒然疾愈稍能飲食洎晚

常五

策杖行繞其家不覺爲倦但覺所夢道流猶  
在其前遽欲入昭成觀家人慮其困憊亦多  
止之不聽入觀於天師真前瞻視良久曰即  
所夢也拜禮數四乃召善夾紵塑人劉處士  
塑天師真改葺堂宇旦夕供養人所祈禱福



祥立應其所塑夾紵真於夾紵內畫羅隔布  
肉色縫絳絲爲五臟腸胃喉嚨十二結十二  
環與舌本相應藏內填五色香各依五藏兩  
數當心置水銀鏡一一精至與常塑不同其  
塑中土形移在天長觀金彩嚴飾亦皆靈應

劉存希天師慎驗

彭城劉存希天師靈驗云自幼以來於唐興  
觀瞻禮天師發心圖寫供養因得絹本出入  
護持雖祇命遠行奉使南北未嘗一日闕香  
火之薦黃巢犯闕時在內署倉惶之際隨駕

不及唯捲天師幘捧持而行同伍三十餘人  
皆爲虜捉或被殺傷獨於衆中得免將入南  
山夜深村落行次遇避難人偶語而問妻在  
其間乃同往洋州大巖山深處結草寓居況  
素無骨肉惟夫婦而已既免支離決志林谷

常五

九

不復有名宦之望野麋山鹿性已成矣山下  
居人以其口食不多時亦助其糧儲饋其鹽  
酪此外拾柏子焚香禮敬天師而已無何舊  
交宋開府入掌樞務知其<sub>在</sub>洋山之中強之  
使出錫以朱紱加以品位固辭不獲甃俛從



焉又駕出石門因便奔竄投莎城山中自匿  
數月有軍士搜山谷不得安居夫婦棄繒帛  
之衣夜行四十餘里出及平陸遙見馬軍十  
餘騎兩面交至已擒虜行人數輩存希夫婦  
驚眙而立馬軍過其側似若不見由是得免  
後數年奉使西川携天師幘而至余亦傳寫  
其本存希深山窮谷虎狼之中軍士紛擾白  
刃之下心常坦然若與數人憂懼之際隱隱  
然若侍立在天師之側亦有感降之事祕而  
不言

龍家樓上孫處士畫天師驗

成都觀街東壁富商龍家樓臨大慈寺後門  
富春巷口會稽山處士孫遇嘗借而居焉每  
於樓上延接賓客而不敢止宿其上孫頗不  
信令僕使三二輩宿於樓中夜深皆被拖拽  
於地上如是數四問其僕役但云睡覺元已在  
樓下不知移拽之時亦無所苦孫處士自宿  
樓上夜深亦聞履屐之聲若數人俱行雖呵  
咄之聲尚不已乃粉飾當梯壁一堵圖寫天  
師真自奉香火由是樓中頓安可以獨寢積



十餘年無復驚怖聞者皆異之洎樓屢參謀  
太保李公師泰欲毀樓遷去余因請得此壁  
移置北帝院中矣

蜀州天師井驗

蜀州天師井在開元觀古老傳云天師自鶴

常五

十

鳴山時乘鶴遊行止於此院或控鶴入井便  
歸山中故側近有馭鶴觀井傍有天師堂井  
上塑為巨鶴三年一淘井獲錢極多以資香  
火修飾人有疾苦取水服之多效瘡癬以井  
水洗之即愈相傳靈驗遠近所知頃年亂離

後觀宇荒殘唯天師堂及井兼古跡楠木在  
焉有軍中人姓陳於觀側開耕水田引觀後  
渠水灌溉修作堰埭乃取天師石井欄元是  
兩片所合併將渠內堰水工匠之徒皆言古  
跡極靈不敢措手陳自下手拆之令人移拽  
猶未了忽覺眼痛良久漸腫三五日中併喪  
兩目至今井欄兩片猶在水渠之中

陵州天師井驗

陵州天師井本傳云天師經行山中有十二  
玉女來謁天師願奉箕箒天師知其地下陰



神也謂之曰汝等何以為獻將觀汝心厚薄  
選而納焉玉女各持一玉環徑皆數寸天師  
曰所獻一般不可併納吾化此十二環令作  
一環投之入地有得之者即納之焉遂合十  
二環為一大環徑餘一尺投於地中隨即深  
陷已成井矣玉女皆脫衣入井以探玉環竟  
不能得天師取其衣藏石匱中玉女至今只  
在井內今陵州鹽井直下五百七十尺透兩  
重大石方及鹹水每年一度淘洗其中須歌  
唱誼聒然後入井不然必見玉女躰居井中

見者多所不利井既深不可數入或絙索斷  
損皮囊墜落唯於天師前炷香良久玉女自  
與挂之依舊不失頃年井屬東川有張填常  
侍主其監務於事稍怠鹽課不登欠數千斤  
交替之後縻留填納未得解去替人素亦崇  
道因與虔告天師云張填所欠之鹽家資已  
盡空此留滯益恐困窮於三五日內願借神  
力增加所出爲其填納與張俱拜祈訴懇切  
自是每日所煎水數四十五函如常而鹽數  
羨益五六日內填之課足此後一如舊數無



復增減矣十二玉女戊亥二人在天唯十人  
在井所煎鹽至戊亥二時亦歇天師初以茲  
地荒梗無人安居山川亦貧不可耕植化鹽  
井以救窮民民聚居井傍戶口日衆遂置州  
統之以天師名故曰陵州天師誓曰我所化  
井以養貧民若官奪其利千年外井當陷矣  
今諸井皆有天師玉女之像焉

皇甫洽事天師驗

成都皇甫洽常崇玄教精奉香燈往來陵州  
圖寫陵井天師真旦夕供養忽隣家疫疾洽

僕使長幼患者十餘人唯洽祇奉公府之外  
每歸家必自給湯藥手供飲膳憂心既切不  
以爲勞亦昏然而寐當午夢童子一人進曰  
天師至矣如是即見天師素衣花冠仗劍而  
入於供養處取水椀執之先噴其身頓覺清

暢次繞其居宅周而內外以水噴之置椀案  
上而去自是十餘口一時平復近隣之家亦  
蒙安豫其家崇奉焚修至今不替天師降時  
停留三日謂洽曰吾爲汝至誠天上得三刻  
假救汝即人間三日也又見天師令侍者竈



中及柴塚下并糞堆中各捉得兩鬼又一大  
鬼坐舍脊上脚垂至簷天師皆令擒送青城  
山中囚之天師以朱筆指之其鬼去如飛疾  
一家皆見之

李瓌夢天師驗

李瓌咸通中爲王府長史以勲貴之族不慣  
食貧居間力闕鬱鬱不得志中夜而寐夢入  
深山窮谷棧閣縈折流水潺湲如此者不知  
其幾千百里又見闐闐雜遝城闔爽塏飛宇  
橫樓摩霄槩日不知其幾千萬家縱神遊目

熙熙自得又出郊甸沙岡原荒榛茂草小松  
巨木間以果林厠以筠篠山嶺危峭或汙或  
平山迴逕盡抵一小郡茅棟縱橫隘路歌側  
傍有公署署內白氣屬天其大如屋中有悲  
歌號呼之聲見一青童引環即路躡危磴步

常五

十三

石梯入門甚峻門內古樹芳草若古觀宇焉  
環素崇玄教頗爲慰悅俄而昇殿見像設尊  
儀笑而謂之曰爾來耶吾遲爾久矣入天門  
漱玄泉古人所修也注丹田存白元上士所  
修也混而合之子其行之陰功及人陰德濟



物千百之家待子而字之勉哉勉哉在明年  
之春瓌再拜稽首受其言而覺是冬頻訴於  
宰執復希入用乃授陵州刺史之任時經歷  
山川郡邑神思敞悅皆如常所經行素未入  
蜀莫可知其由也至郡乃謁天師昇階及門  
至于殿所覩真像侍衛屋宇布列醒然而悟  
乃叶其所夢矣乃以俸金修天師之堂加以  
丹牖立爲銘碣誌其白氣屬天乃鹽井之所  
也悲歌之聲乃轉車之人也而內修之訣瓌

未得之

瓌即西平  
王孫也

邛州趙可言事天師驗

邛州趙可言尊師早年入道殊無所修因夢  
天師遂圖寫供養其性真直朴素言無有二  
人有休咎修禳疾苦祈請必問天師以擲筮  
爲定可則往否則止故其所救人疾厄爲人  
祝祈無不驗者是歲群僧凌侮道門因太守  
設大齋未前數日於閭里街開揚言曰西川  
諸道士一百餘人要於齋日論義闔勝而密  
雇村夫百餘人假製道衣欲臨時僞作諸州  
道士爾道流殊不知忽有人以此報可言方



與道衆詳度虛實未有拒之之計可言曰此甚不難但令其修大齋不得即此事廢矣人或曰刺史修大齋節度使已許剋日既定何可廢乎曰我自有計人又曰一度拒之猶恐不可若終要修設又如何止之可言曰任其

常五

十四

十度部署終不許之此言定矣去齋二日之前街坊陳設遠近奔赴人士誼鬧充塞鄺井可言祝問天師訖徑往白鶴山下火井潭邊立而呪祝若與人言話爾行數步却迴向潭語曰待我到舍即雨如是徑歸纔及其家雷

雨大作三日不絕齋乃移日至所定之日雨復如前五度改日及期皆雨雷霆誼怒風拔林木陳設之具置立不得齋竟不成凡可言所行所爲一依天師所命天師不許事皆無驗

謝貞見天師授符驗

謝貞者臨邛工人也善巧墁而用意精確鵠鳴化天師修道老君感降之所上頂有上清古宮相傳云天師時所制歲月甚多而結構如新但瓦破壁壞而已貞傭工爲修泥之貞



精研盡意壇飾周密有道流引二從者觀其  
功用神彩異常身逾九尺自門而入謂貞曰  
山中難值修葺頗媿用心以手畫地作一符  
使貞再三審記之曰此後有疾者雖千里之  
外行符必效勿多取錢但可資家給終身衣

常五

十五

食而貞記其符行之極效大獲金帛家業殷  
豐鵲鳴諸山無天師真像陵州井中所塑又  
非世代子孫所傳之真貞忽於青城山遇峽  
中賈客修齋有天師小幘供養乃是應見之

真爾

真符  
劉方瀛天師靈驗

天台道士劉方瀛師事老君精修介潔早佩  
畢法籙常以丹篆救人與同志弋陽縣令劉  
翹按天師劔法以五月五日就弋陽葛溪鍊  
鋼造劔救符禁水疾者登時即愈嘗於黃巖  
縣修齋救壇以救疫毒有見鬼巫者潛往眎  
之見鬼神數千奔北潰散如大陣崩敗一縣  
之疫數日而愈咸通末方瀛無疾而終戒其  
門人使與劔俱葬莫敢違之乾符中和間台  
州帥劉文下裨將李生領徒發其墳欲以取



劍見其尸柔輒谷色不變如醉臥而已顧眎  
其劍哮吼有聲羣黨驚懼卒不敢取李生命  
瘞之而去不獨劍之有靈劉方瀛亦陰景鍊  
形得道之流也

道教靈驗記卷之八

